

四庫全書

經部

欽定四庫全書

春秋集義卷十五

宋 李明復 撰

莊公

二十年春王二月夫人姜氏如莒

謝湜曰比年如莒甚之也

胡安國曰十五年夫人姜氏如齊至是再如莒而春秋書者禮義天下之大防也其禁亂之所由生猶防

止水之所自來也衛女嫁于諸侯父母終思歸而不
得故泉水賦許穆夫人閔衛之亡思歸唁其兄而阻
于義故載馳作聖人錄于國風以訓後世使知男女
之別自遠于禽獸也今夫人如齊以寧其父母而父
母已終以寧其兄弟又義不得宗國猶爾而況如莒
乎婦人從人者也夫死從子而莊公失子之道不能
防閑其母禁亂之所由生故初會于禚次享于祝丘
又次如齊師又次會于防于穀又次如齊又再如莒

此以舊坊爲無所用而廢之者也是以至此極觀春秋所書之法則知防閑之道矣

夏齊大災

程氏學曰人火曰火天火曰災爲害者亦曰災

謝澁曰火出爲害乃天降災于人故火焚宮廩皆曰災其爲災大故書大災

秋七月冬齊人伐戎

謝澁曰戎爲中國患久矣合諸侯攘戎狄使犬羊順

服而中國安強方伯之事也桓公務廣土地服諸侯以強齊國而已故滅譚滅遂以益封疆伐宋伐郟伐鄭伐魯以振威力至于荆入蔡戎侵魯未嘗以救難之師一過而問焉乃至十年之久然後起而伐戎將何以服四夷強中國哉春秋書齊人伐戎而桓公討戎之不力由此見矣

二十有一年春王正月夏五月辛酉鄭伯突卒

胡安國曰杜預稱莊公四年鄭伯遇于垂者乃子儀

也按春秋突歸于鄭之後出奔蔡入于櫟皆以名書猶繫于爵雖篡而實君雖君而實篡不沒其實也忽雖世子其出奔猶不得稱伯以其實不能君也況子儀雖間得立其為君微矣豈敢輕去國都與諸侯會于外乎故知遇于垂者乃厲公也其始終書爵不沒其實也亦可以為居正而不能保者之戒矣

秋七月戊戌夫人姜氏薨冬十有二月葬鄭厲公

二十有二年春王正月肆大眚

程頤語錄或問肆大眚如何曰大眚而肆之其失可知書言眚災肆赦者言眚則肆之眚是自作之罪故災則赦之災是過失之事故也凡赦何嘗及得善人諸葛亮在蜀十年不赦審此爾又曰舜典曰眚災肆赦臯陶曰宥過無大易曰君子以赦過宥罪呂刑曰五刑之疑有赦五罰之疑有赦斯先王肆赦之道即未聞大眚也肆大眚者元惡大憝俱肆之辭也上廢天討下虧國典縱釋有罪賊虐無辜莫斯爲甚天子

尚不可況魯國諸侯而敢專肆哉後世惠姦宄賊良民其泥于此乎殊失春秋之旨也

謝湜曰以不明入罪謂之眚書曰眚災肆赦肆者寬之也赦者釋之也災自外至眚出于人爲故災則赦之眚則肆之而已謂之肆則罪有重輕取其情在可原者而肆之也故先王有肆眚無肆大眚大眚罪之大者書所謂元惡大憝是也元惡大憝皆在所肆則縱姦凶釋寇暴天討不行而善良柔弱之人由此受

禍矣將以為仁反以為害將以為治反以為亂豈先
王肆眚之意哉春秋書肆大眚著其失也後世以惠
姦宄為赦者其源蓋出于此失春秋罪魯之意矣

胡安國曰肆眚者蕩滌瑕垢之稱也舜典曰眚災肆
赦易于解卦曰君子以赦過宥罪呂刑曰五刑之疑
有赦五罰之疑有赦周官司刺掌赦宥之法一宥曰
不識再宥曰過失三宥曰遺忘一赦曰幼弱再赦曰
老耄三赦曰憊愚未聞肆大眚也大眚皆肆則廢天

討虧國典縱有罪虐無辜惡人幸以免矣後世有姑
息為政數行恩宥惠姦宄賊良民而其弊益滋蓋源
流于此故諸葛孔明曰治世有大德不以小惠其為
政于蜀軍旅數興而赦不妄下蜀人久而歌思猶周
人之思召公也斯得春秋之旨矣肆眚而曰大眚譏
失刑也

朱熹語錄或問伊川程氏言災自外來眚自內作是
否曰看來只一般微有不同耳災是偶然生于彼者

昔是過誤致然書曰昔災肆赦春秋曰肆大眚皆以其過誤而赦之也

癸丑葬我小君文姜

謝湜曰文姜在王法雖當絕然于莊公有子母未絕之恩魯當以夫人之禮葬之故薨葬皆書夫人之義從君為得禮宋共公夫人曰宋共姬是也列國為謚皆私謚也觀文姜私謚稱文而魯國謚禮之失見矣胡安國曰文姜之行甚矣而用小君之禮其無譏乎

以書夫人遜于齊不稱姜氏及書哀姜薨于夷齊人以歸攷之則議小君典禮當謹之于始而後可正文姜已歸為國君母臣子致送終之禮雖欲貶之不可得也

陳人殺其公子禦寇

謝湜曰桓公葵丘之會四命曰無專殺大夫大夫有罪諸侯不得專殺古之制也自邦國擅威福作好惡大夫有罪無罪諸侯皆專殺之諸侯政壞則又有宗

族國人起而專殺者矣凡殺稱國以明國之罪也稱
國人以著其國亂也故陳殺禦寇書陳人以示國政
大壞而下人專殺也書公子以示下人專殺而君之
骨肉不得保其身也禦寇宣公子君之嗣也不書世
子東宮未正故也國莫尊于君親莫隆于子君之嗣
子而國人以凶逆殺焉陳國上下大亂可知矣

胡安國曰公子之重視大夫殺而或稱君或稱國或
稱人何也稱君者獨出于其君之意而大夫國人有

不與焉如晉侯殺其世子申生之類是也稱國者國君夫人與聞其事而不請于天子如鄭殺其大夫申侯之類是也稱人者有二義其一國亂無正衆人擅殺而不出于其君則稱人如陳人殺其公子禦寇之類是也其一弑君之賊人人之所得討背叛之臣國人之所同惡則稱人如衛人殺州吁鄭人殺良霄之類是也攷于傳之所載以觀經之所斷則罪之輕重自見矣

呂祖謙曰陳人陳宣公也陳公子完是厲公躍子史記謂厲公佗之子非也當以釋例爲正

夏五月秋七月丙申及齊高傒盟于防

程頤曰高傒上卿魯無使微者與盟之理蓋諱公盟始與仇爲婚惡之大也

謝湜曰盟于防公欲結昏于齊故也親盟大夫以求婚恥之大也大喪未畢而謀婚惡之大也故防之盟諱不書公其始諱不書公而公之恥惡由此見矣至

納幣逆女則直書其實以迹不可隱故也

胡安國曰微者名姓不登于史冊高侯之貴大夫也曷爲就吾之微者盟蓋公也其不言公諱與高侯盟也來議婚結娶仇人女大惡也娶者其爲吉下主乎已上主乎宗廟以爲有人之心者宜于此焉變矣公親如齊納幣則不待貶也

冬公如齊納幣

程頤曰齊疑婚議故公自行納幣後二年方逆齊難

之也

程氏學曰冬公如齊納幣二十四年夏公如齊逆女
秋公至自齊八月丁丑夫人姜氏入者莊公于齊義
不共戴天迺娶仇讐之女以奉宗廟母喪未終復忘
哀而圖婚親如齊納幣如齊逆女不孝之惡不待貶
絕而自見矣夫人姜氏不書至而云入者自外而入
不順之辭也言魯為不可受姜氏為不可入也
二十有三年春公至自齊

謝湜曰禮有親迎無親納幣廢大喪以圖婚姻娶讎
女以事宗廟躬幣禮以黷儀法其惡不待貶絕而見
矣莊公即位二十四年而後娶宮闈不正可知也納
幣日事也納幣歷時然後返則公之適齊非獨納幣
而已

祭叔來聘

程氏學曰祭叔來聘不言使者原其來意非天子之
命爾

謝湜曰祭叔天子內臣祭公也王臣外交非禮也祭公比外諸侯以聘禮至魯故春秋奪爵書字貶之也朝聘皆私交也在祭伯則奪其朝在祭叔則奪其爵者蓋奪其朝則知其不當朝奪其爵者知其在所黜胡安國曰穀梁子曰其不言使天子之內臣也不正其私交故不與使也祭伯來朝而不言朝祭叔來聘而不言使尹氏王子虎劉卷來討而不書其爵秩皆所以正人臣之義也人君而明此不容下比之臣人

臣而明此不為交私之計黨錮之禍息矣

夏公如齊觀社

程氏學曰莊公越境觀讎國之社不待譏而惡自見也

程頤曰婚議尚疑故公以觀社為名再往請議後三年方逆蓋齊難之

胡安國曰莊公將如齊觀社曹劌諫曰齊棄太公之法觀民于社君為是舉而往觀之非故業也天子祀

上帝諸侯會之受命焉諸侯祀先公卿大夫佐之受事焉不聞諸侯之相會祀也君舉必書書而不法後嗣何觀矣

呂祖謙曰觀兵是也

公至自齊

謝湜曰為社稷主而越境觀社于齊非法也觀社日事也觀社歷時然後返則公之適齊非獨觀社而已
荆人來聘

謝湜曰聘問之禮通于中國故荆進稱人以人道齒之也

胡安國曰荆自莊公十年始見于經十四年入蔡十六年伐鄭皆以州舉者惡其猾夏不恭故狄之也至是來聘遂稱人者嘉其慕義自通故進之也朝聘者中國諸侯之事雖蠻夷而能修中國諸侯之事則不念其猾夏不恭而遂進焉見聖人之心樂與人為善矣後世之君能以聖人之心為心則與天地相似凡

變于夷者叛則懲其不恪而威之以刑來則嘉其慕義而接之以禮邇人安遠者服矣春秋謹華夷之辨而荆吳徐越諸夏之變于夷者故書法如此

公及齊侯遇于穀蕭叔朝公

謝湜曰莊公志在于齊故九月之間三涉齊國既如齊納幣又如齊觀社又與齊侯遇于穀又曰蕭叔中國附庸故書字朝以修禮莊公出游境上而受小國之朝非法之甚也

胡安國曰穀齊地蕭叔附庸之君也爲禮必當其物
與其所而後可以言禮大夫宗婦覲而用幣則非其
物也蕭叔朝公在齊之穀則非其所也嘉禮不野合
而朝公于外是委之于野矣故禮非其所君子有不
受必反之于正此亦春秋撥亂之意也

秋丹桓宮楹

程氏學曰宗廟之飾國有彛典而妄肆奢麗加于禰
宮亂王制黷先君不恭莫大矣故書曰丹桓宮楹直

書其事具文見意也

謝澁曰廟飾蓋有常制書丹楹著其奢麗也侈宗廟以瀆先君僭宮飾以干王法事親不遵禮法由此見矣

冬十有一月曹伯射姑卒十有二月甲寅公會齊侯盟于扈

程頤曰遇穀盟扈為要結姻好

謝澁曰孫氏謂謀納姜氏婚姻聞以德選矣未聞以

盟結之也

胡安國曰程氏曰遇于穀盟于扈皆為要結姻好也
傳稱男子二十而冠冠而列丈夫三十而不娶則非
禮也然天子諸侯十五而冠者以娶必先冠而國不
可久無儲貳欲人君早有繼體故因以為節也鰥老
而無妻之稱舜方三十未娶而師錫帝堯已曰有鰥
在下矣妻帝之二女則不告于父母以為告則不得
娶而廢人之大倫堯亦不告而妻焉其欲及時而無

過如此也今莊公生于桓之六年至是三十有六載矣以世嫡之正諸侯之貴尚無內主同任社稷之事何也蓋為文姜所制使必娶于母家而齊女待年未及故莊公越禮不顧如此其急齊人有疑如此其緩而過于穀盟于扈要結之也娶夫人奉祭祀為宗廟之主而母言是聽不以大義裁之至于失時不孝甚矣春秋詳書于策為後戒也

二十有四年春王三月刻桓宮楹

謝湜曰既丹宮楹又刻宮桷其華至矣人君不知儉約則巧麗不法有如此者故明君常謹微

胡安國曰公將逆姜氏丹桓宮之楹也其桷為盛飾以誇示之此非特有童心而已御孫諫曰儉德之共也侈惡之大也先君有共德而君納諸大惡無乃不可乎自常情觀丹楹刻桷疑若小失而春秋詳書于策御孫以為大惡何也桓公見殺于齊不能復而盛飾其宮誇示仇人之女乃有亂心廢人倫悖天道而

不知正者也御孫知爲大惡而不可盡言春秋謹禮于微正後世人主之心術者也故詳書于策斥言桓宮以見惡莊爲後世鑒也

葬曹莊公夏公如齊逆女秋公至自齊

謝湜曰逆讎女以爲夫人非孝也以親迎出而甚至不與夫人同歸非正也

胡安國曰穀梁子曰親迎常事也不志此其志何也不正其親迎于齊也或曰常事不志詳事不常也親

迎可以常乎則其說誤矣所謂常者其事非一有月
事之常則視朔是也有時事之常則婚姻納幣逆女
至歸之類是也凡此類合禮之常則不志矣其志則
于禮不合將以爲戒者也若夫崩薨卒葬即位之類
不以禮之合否而皆書此人道始終之大變也其于
親迎異矣

八月丁丑夫人姜氏入

程頤語錄或問丁丑夫人姜氏入何故獨書入曰此

娶仇女故書入言宗廟不受也

謝澁曰哀姜仇人之女也以見祖考祖考弗安以奉宗廟宗廟弗享然則哀姜非魯之婦也莊公外忘不共戴天之讎內忘疾首痛心之戚備禮取之以爲夫人悖理逆親甚矣故哀姜之至也春秋外而書入以明魯之不當受也

胡安國曰何以不致不可見乎宗廟也姜氏齊襄公之女入者不順之辭以宗廟為弗受也婚義以正始

爲先而公不與夫人皆至姜氏不從公而入已失夫
婦之正弑閔孫邾之亂兆矣莊公不勝其母越禮踰
時俟仇人之女薦舍于宗廟以成好合卒使宗嗣不
立弑逆相仍幾至亡國故春秋詳書其事以著莊公
不孝之罪

戊寅大夫宗婦覲用幣

餘見綱領中卷并下卷

謝湜曰古者大夫有見小君之禮修臣職也以卑朝
尊曰見相見曰覲大夫于夫人有見無覲有執贄無

用幣諸侯庭實有幣獻方物也贄則與幣異矣男子以玉帛禽鳥為贄非帛也以象德也以示執此德不敢廢也女子以棗栗脯脩為贄非幣也以致敬也以示修此職不敢廢也大夫宗婦皆覲以幣則是相交以財相賂以利也外內相交以財相賂以利而閨門之禮亂矣大夫宗婦覲用幣非禮也

胡安國曰禮夫人至大夫郊迎明日執贄以見宗婦大夫之妻也公事曰見私事曰覲見夫人禮也曷為

私言之夫人不可見乎宗廟則不可以臨諸臣故以私言之也覲用幣何以書男贄大者玉帛小者禽鳥以章物也女贄不過榛栗棗脩以告虔也今男女同贄是無別也公子牙慶父之亂兆矣春秋詳書正始之道矣

呂祖謙曰公使宗婦覲用幣何休公羊注云禮夫人至大夫皆郊迎明日大夫宗婦皆見故著其明日也大夫妻言宗婦者大夫爲宗子者也

大水冬戎侵曹曹羈出奔陳赤歸于曹

程氏學曰冬戎侵曹曹羈出奔陳赤歸于曹戎侵曹故羈奔而赤歸制在我故也與桓十一年宋人執鄭祭仲鄭忽出奔衛突歸于鄭略同曹伯射姑卒已踰年而羈猶名者由不能自定其佐故為戎所逐也

謝湜曰羈曹世子赤曹公子戎之侵曹也羈微弱不能保位故羈棄國出奔羈之出也赤為戎所納而人心從之故赤歸曹春秋首書戎侵曹而繼以羈出赤

歸者以明曹國廢立之命皆制于戎也莊公之卒也
羈以世子嗣位已踰年矣稱名不稱爵以其絕于國
人也赤以公子入國非正也非正而稱歸以罪羈失
人心而國人歸赤也其于羈也稱國以明正去爵以
示絕其于赤也去國以明非正稱歸以示得國而羈
之喪失君道赤之進不由正于此見矣曹國之命制
于戎鄭國之命制于權臣其患一也故權臣暴橫而
鄭國擅命廢立出于夷狄羈出赤歸是也齊桓倡大

義以合諸侯主盟約以令邦國討暴救亂乃其職也
今也曹羈危弱而不能定諸戎作難而不能正然則
桓公用兵特以強齊而已列國水火之難非所恤也
胡安國曰杜預謂羈蓋曹世子也曹伯已葬猶不稱
爵者以微弱不能君故爲戎所逐爾赤者曹之庶公
子歸易詞也宋人執鄭祭仲而忽出突歸權在宋也
戎侵曹而羈出赤歸制在戎也使鄭忽曹羈明而能
斷雖有宋戎之衆突赤之孽何緣而起以國儲君副

不能自定其位于誰責而可故雖以國氏皆不書爵
爲居正者之戒

郭公

謝湜曰郭公蓋郭公文誤為公昔齊桓謂郭為亡國
以其好善而不能行惡惡而不能去也然則郭有取
亡之道明矣故書郭亡

胡安國曰此郭公也義不可曉而先儒或以為郭亡
者于傳有之齊桓公之郭問父老曰郭何故亡曰以

其善善而惡惡也公曰若子之言乃賢君也何至于
亡父老曰郭君善善不能用惡惡不能去所以亡也
考其時與事謂之郭亡理或然也夫善善而不能用
則無貴于知其善惡而不能去則無貴于知其惡
未之或知者猶有所覬也夫既或知之矣不能行其
所知君子所以高舉遠引小人所以肆行而無忌憚
也然則非有能亡郭者郭自亡爾

二十有五年春陳侯使女叔來聘

謝湜曰女叔命大夫故書字十九年齊陳伐我西鄙
今齊與魯親故陳女叔亦來修聘

呂祖謙曰陳女叔來聘結陳好也十九年陳伐魯西
鄙乃至此始結好須考前後斷絕好處如無只是未
曾往來

夏五月癸丑衛侯朔卒

謝湜曰朔衛惠公魯不會葬故不書葬

六月辛未朔日有食之鼓用牲于社

謝湜曰聲陽也日食伐鼓所以助陽而攻陰也社土神陰氣之主也日食陰慝之氣掩之也非社之陰氣爲孽也魯人之救變也以社爲陰主于是鼓以攻陰用牲于社以祈神失之遠矣

胡安國曰按禮諸侯旅見天子入門不得終禮者四而日食與焉古者固以是爲大變人君所當恐懼修省以答天意而不敢忽也故夏書曰乃季秋月朔辰弗集于房鼓奏鼓嗇夫馳庶人走周官鼓人救日月

則詔王鼓太僕凡軍旅田旅贊王鼓救日月亦如之
諸侯用幣于社伐鼓于朝退而自責皆恐懼修省以
答天意而不敢忽也然則鼓用牲于社何以書譏不
鼓于朝而鼓于社又用牲則非禮矣

伯姬歸于杞

胡安國曰其不言逆何也逆者非卿其姓名不登于
史策則書歸以志禮之失也大夫來逆名姓已登于
史策足以志其失矣猶書歸者以別于大夫之自逆

者也猶書歸者紀伯姬是也自逆者莒慶齊高固是也

秋大水鼓用牲于社于門

謝湜曰社主土門主出入大水之爲患也魯人欲以聲駭變故鼓欲以土勝水故用牲于社欲以門禦水故用牲于門凡天地之變先王責諸已求諸人而已猶以為未也又以陰陽象類致力乎祈禳祭享之間所以盡救災之道也方是時莊公君道不修國事不

治久矣魯人不知所以消變而一切求之祈禳之間
其祈禳一切以意而不以禮失救災之道遠矣大水
漂蕩可畏而欲以鼓駭之不亦愚乎大水出為國害
而欲以社勝之以門禦之不亦惑乎

冬公子友如陳

謝湜曰友莊公弟以公子為卿故書公子如陳報陳
之聘也

春秋集義卷十五

欽定四庫全書

經部

春秋集義卷十六至十九

詳校官通政使_臣 夢吉

給事中_臣 溫常 綬 覆 勘

總校官原任中允_臣 王燕緒

校對官原任典簿_臣 郭祚熾

謄錄監生_臣 陳際龍

欽定四庫全書

春秋集義卷十六

宋 李明復 撰

莊公

二十有六年春公伐戎夏公至自伐戎

謝湜曰戎為魯病故公伐戎

曹殺其大夫

謝湜曰凡大夫無罪而死者唯書大夫不書名大夫

君之股肱也書大夫以見其有股肱之力也大夫有股肱之力而不以其罪殺之君之過也君不以罪殺大夫而輔臣不能諫大臣不能救國之罪也故書國以罪其國

胡安國曰稱國以殺者國君大夫與謀其事不請于天子而擅殺之也義繫于殺則止書其官曹殺其大夫宋人殺其大夫是也義繫于人則兼書其名氏楚殺其大夫得臣陳殺其大夫洩冶之類是也然殺大

夫而曰大夫與謀其事何也與謀其事者用事之大夫也是殺者不得于君之大夫也所謂義繫于殺者罪在于專殺而見殺者之是非有不足紀也故止書其官而不錄其名氏也古者諸侯之卿大夫士命于天子而諸侯不敢專命也其有罪則請于天子而諸侯不敢專殺也及春秋時國無小大卿大夫士皆專命之而不以告于王朝有罪無罪皆專殺之而不以歸于司寇無王甚矣五伯三王之罪人而葵丘之會

猶曰無專殺大夫故春秋明書于策備天子之禁也
凡諸侯之大夫方其正交中華會盟征伐雖齊晉上
卿止錄其名氏至于見殺雖曹莒小國亦書其官或
抑或揚或奪或與聖人之大用也明此然後可以司
賞罰之權矣

秋公會宋人齊人伐徐

謝澁曰詩曰濯征徐國書曰徐戎並興徐戎類也徐
爲宋病故齊魯爲宋伐徐

胡安國曰按書伯禽嘗征徐戎則戎在徐州之域為魯患舊矣是年春公伐戎秋公伐徐者必戎與徐合兵表裏為魯國之患也故雖齊宋將卑師少而公獨親行其不致者役不淹時而齊宋同會則無危殆之憂

冬十有二月癸亥朔日有食之

二十有七年春公會杞伯姬于洮

謝湜曰伯姬魯女洮魯地女有歸寧于國無出會于

境洮之會在魯有敗禮之愆在杞失正家之道

胡安國曰左氏曰會于洮非事也天子非展義不巡狩諸侯非民事不舉卿非君命不越境伯姬莊公之女非事而特會于洮愛其女之過而不能節之以禮此春秋之所禁也惟不節之以禮然後有使自擇配如僖公之于季姬典訓亡矣

夏六月公會齊侯宋公陳侯鄭伯同盟于幽

程頤曰同志而盟非率之也

謝湜曰鄭文公背楚復與諸侯同心故稱同盟明年
荆伐鄭公會二國救鄭然則鄭苦于楚欲與中國同
盟可知也

胡安國曰同盟之例有惡其反覆而書同盟有諸侯同
欲而書同盟此盟鄭伯之所欲而書同盟者也凡盟
皆小國受命于大國不得已而從焉者也其有小國
願與之盟非出于勉强者則書同盟所以志同欲也
前此鄭伯嘗貳于齊矣至是齊桓強盛有霸中國攘

夷狄之勢諸侯皆歸之鄭伯于是焉有畏服之心其得與于盟所欲也故特書同穀梁子所謂于是而後授之諸侯是也其授之諸侯得衆也視他盟為愈矣呂祖謙曰同盟于幽陳鄭始服于齊此處最要看蓋前服楚故也

秋公子友如陳葬原仲

程氏雜說曰公子友如陳葬原仲人臣之禮無外交大夫非君命不越境公子友違王制委國事私會他

國大夫之葬其譏可見也

謝湜曰諸侯相葬禮也列國大夫相葬非禮也人臣無境外之交鄉非君命不越境公子友以私事出境葬大夫其專命僭制不待貶絕而自見矣

胡安國曰公子友如陳葬原仲私行也人臣之禮無私交大夫非君命不越境何以通季子之私行而無貶乎曰春秋端本之書也京師諸夏之表也祭伯以寰內諸侯而來朝祭叔以王朝大夫而來聘尹氏以

天子三公來告其喪誣上行私表不正矣是故季子
違王制委國事越境而會葬齊高固莒慶以大夫即
魯而圖婚其後陳莊子死赴喪于魯魯人欲勿哭繆
公召縣子而問之曰古者大夫束脩之間不出境雖
欲哭之焉得而哭諸今之大夫交政于中國雖欲勿
哭焉得而勿哭末流可知矣春秋深貶王臣以明始
亂備書諸國大夫無譏焉則以著効也凡此皆其正
本之意

楊時語錄或問陳莊子死赴于魯縣子謂繆公哭之而曰有愛而哭之有畏而哭之夫哭之也以畏何也曰以言世有然也非古之禮也若古之大夫則束脩之間不出境故生無相問其死也何赴告之有哉後世國亂而君昏為臣者交政于中國故生則同盟死則赴告非禮也故春秋書之所以著其罪也

呂祖謙曰卿非君命不越境如季友如陳葬原仲非也

冬杞伯姬來

謝湜曰夫人父母在則歸寧歿則使卿故衛女思歸寧而不得作詩以自見也伯姬非歸寧也其至魯非禮也故直書來女子之性縱之則驕伯姬爲杞國婦而會之于洮失防閑之道矣然則姬違禮驕恣皆莊公兆之也

胡安國曰左氏曰歸寧也禮父母在歲一歸寧若歸而合禮則常事不書其曰杞伯姬來者不當來也女

子有行遠父母兄弟春會于洮矣冬又歸魯故知其不當來也來而必書春秋于男女往來之際嚴矣

莒慶來逆叔姬

程氏學曰莒慶來逆叔姬人臣之禮無外交故大夫非君命不越境以莒慶國卿而與魯為婚是外交也不書逆女而云逆叔姬以別卿為君逆也不書歸者以累乎魯也宣五年齊高固及子叔姬來非禮尤甚謝湜曰慶不氏未賜族莒慶以國卿婚于魯臣子以

私事交于諸侯也。臣子外交而大夫犯分干政之患，由此熾矣。故公子友葬原仲于陳，莒慶逆叔姬，不書女以別卿爲君逆也。女適大夫，不書歸者，不與其外交絕之也。

胡安國曰：莒慶，莒大夫也；叔姬，莊公女也。何以稱字？大夫自逆則稱字爲其君逆，則稱女尊卑之別也。何以書諸侯嫁女于大夫而公自主之，非禮也。

杞伯來朝

謝湜曰伯姬在魯故杞伯亦來朝也稱伯非侯爵也
公會齊侯于城濮

謝湜曰城濮衛地杜氏謂將討衛

二十有八年春王三月甲寅齊人伐衛衛人及齊人戰

衛人敗績

又見綱領下

程氏學曰春秋之義微顯闡幽者謂是類也齊人伐
國之罪其文可見而衛人與戰之罪不變文不足以
明之何者彼以不道加諸我已當持義而不戰上可

以訴諸天子下可以告于諸侯或備其疆場折之文
辭斯亦可矣奚爲忽然興師遽與之戰哉是謂以桀
攻桀何較曲直乎故聖人特書曰及所以明微也

謝澍曰齊人伐衛以衛有可伐之罪也衛人有辭不
服故與齊人戰焉衛人力不勝齊故敗績桓公威力
可謂盛矣然伐國不以道則雖小國有至舉兵相敵
終于卒伍敗衄而後退焉者也故孟子曰以力假仁
者霸以力服人者非心服也桓公以仁義用兵特假

之而已安能使人心服哉故齊人之伐衛也上書伐
下書戰以著衛人無服齊之心也觀衛人心不服齊
而齊桓無服衛之德由此見矣春秋戰分主客戰而為
主者其罪大戰而為客者其罪輕以戰由主起故也
齊人以兵來伐我苟直焉以義辨吾之直而勿與之
校可也謹邊陲嚴備守需其變而勿與之爭可也上
訴天王下告列國求為之助則解其危可也若夫不
恤民命而以戰為心則助反在我而不在人罪反在

此而不在彼矣然則春秋以齊人主伐而以衛人主戰者以明兩國之戰由衛人欲戰所致也戰之為禍大矣原野厭人之肉川谷流人之血皆戰之由也故仁者之兵有征無戰邦國有罪以兵誅罪而已服則舍焉未嘗以戰為事也邦國有亂以兵定亂而民順則止焉未嘗以戰為事也用兵而至于戰者皆好功嗜殺而輕民命也故春秋以大罪歸于首戰之人胡安國曰春秋紀兵及者為主齊人舉兵而伐衛衛

人見伐而受兵則以衛及之何也按左氏衛嘗伐周
立子頽至是王使召伯廖賜齊侯命且請伐衛則齊
人舉兵乃奉王命聲衛立子頽之罪以討之也為衛
計者誠有是罪則當請歸司寇服刑可也若惠徼康
叔不泯其社稷使得自新亦惟命則可以免矣今不
徵詞請罪而上逆王命下拒方伯之師直與交戰則
是衛人爲志乎此戰故以衛主之也戰不言伐伐不
言日而書日者戰之日也見齊人奉詞伐罪方以是

日至而衛人不請其故直以是日與之戰所以深疾之也而聖人之情見矣齊稱人將卑師少也

呂祖謙曰王賜齊侯命使伐衛周所以衰者只緣此齊亦未肯十分著力只是略應命耳又曰取賂而還桓公做事管仲亦有調護不得處

夏四月丁未邾子瑱卒秋荆伐鄭公會齊人宋人救鄭謝湜曰文公與諸侯同盟故荆伐鄭聘稱人進之也伐復稱荆狄之也蠻夷凌犯中國久矣天子不能制

方伯不能却小國困于水火亦久矣方是時荆以不仁伐鄭而三國能出力救之三國與鄭同盟而復能與之同患小國有息肩之地矣書救鄭善之也

胡安國曰按左氏楚令尹子元無故以車六百乘伐鄭入自純門是陵弱暴寡之師也故以州舉狄之也鄭人將奔桐丘諸侯救之楚師夜遁是得救急恤鄰之義也故書救鄭善之也齊宋稱人將卑師少桓公主兵攘夷安夏之事見矣

冬築郿

程頤曰春秋土功之事無大小莫不書之其意止欲人君重民之力也

又曰春秋凡用民力必書其所興作不時害義固為罪也雖時且義必書見勞民為重事也後之人君知此義則重于用民力也

謝湜曰凡土功築高墉曰城築基築垣牆曰築郿非獨城而已故稱築

胡安國曰郿邑也凡用功大曰城小曰築故館則書
築臺則書築園則書築郿邑而書築者創作邑也其
志不視歲之豐凶而輕用民力于其所不必爲也則
非人君之心矣

大無麥禾

謝湜曰無麥苗言稼無麥禾言食內外倉廩困乏故
大無麥禾無麥苗以大水無麥禾以用度無節不知
圖國用審歲計故及冬乏食而後知何休謂秋水所

傷誤矣莊公即位二十八年興師者十二會盟者九
若狩禘納幣觀社皆非事而出境者也若丹楹刻楯
築郿皆非法而興工者也費用可謂不節矣出之而
不知計之用之而不知節之故築郿之後麥禾不足
以周一歲之備也

胡安國曰麥熟于夏禾成在秋而書于冬者莊公惟
宮室臺榭是崇是飾費用浸廣調度不充有司會計
歲入之多寡虛實然後知倉廩之竭也故于歲杪而

書曰大無麥禾大無者倉廩皆竭之詞也古者三年耕餘一年之食九年耕餘三年之食今莊公享國二十八年當有九年之積而虛竭如此所謂寄生之君也民事古人所急食者養民之本不敢其本而肆侈心何以為國故下書臧孫告糶以病公而戒來世為國之不知務也

臧孫辰告糶于齊

謝湜曰告卑辭也凡告有從有不從其得未可必也

國以食為本為國而至于告糴危道也內有窘急之憂外有陵削之形其國不危者特幸而已書告糴危之也水旱之變天時所不免也先王豫防以待其變故雖水旱而不能為之患也無水旱螽螟而至于告糴則魯之不善為國可知矣古者冢宰制國用必于歲之抄用地小大視年豐耗量入以為出三年耕必有一年之蓄九年耕必有三年之蓄又豈有告糴之困哉

胡安國曰劉敞曰不言如齊告糴而曰告糴于齊言如齊則其詞緩告糴于齊則其情急所以譏大臣任國事治名而不治實之蔽也魯人悅其名而以急病讓夷為功君子責其實而以不能務農重穀節用愛人為罪

二十有九年春新延廡

謝澁曰廡以安馬而已亦惡舊而新之莊公好治宮室可知也冬方告糴而春又興工民困之不憂廡陋

之為恤與孔子問傷人不問馬異矣

胡安國曰言新者有故也何以書昔韓昭侯作高門
屈宜曰不時所謂時者非時日也人固有利不利時
前年秦拔宜陽今年旱君不以此時恤民之急而顧
益奢此所謂時絀舉羸者也故穀梁子曰古之君人
者必時視民之所勤民勤于力則功築罕民勤于財
則貢賦少民勤于食則百事廢矣大無麥禾告糴于
齊冬築郿春新延廡以其用民力為已悉矣

夏鄭人侵許秋有蜚

謝湜曰何休謂臭惡之蟲南方暑氣所生然則蜚不宜有則爲災

冬十有二月紀叔姬卒

謝湜曰叔姬卒于鄆公爲之服故書卒前書歸鄆後書卒志魯不能安叔姬也

胡安國曰紀已滅矣其卒之何見紀侯去國終不能自立異于古公亶父之去故特書叔姬卒而不卒紀

侯以明其不爭而去則可能使其民從而不釋則微矣

城諸及防

謝湜曰諸防二邑諸役纔已防役又興書及著其不恤民力也凡土功苟害于民雖時勿興可也左氏以為書時誤矣

三十年春王正月夏次于成

謝湜曰非事宿兵于境故書次

秋七月齊人降鄆

程氏學曰齊人降鄆鄆微弱小國齊肆其強力脅而服之也不書鄆降而曰齊人降鄆者以齊之強故罪之深以鄆之弱故責之薄也春秋之義抑強扶弱而已若鄆降于齊師則義在責魯故云爾

謝湜曰鄆降鄆人服齊而降之也降鄆齊人逼鄆而降之也降者在鄆故曰鄆降降者在齊故曰降鄆書曰降鄆而不曰鄆降者非齊之強閔鄆之弱也其降

也責齊不責鄆而春秋抑強扶弱之義見矣取國遷國皆滅也徐人取舒宋人遷宿齊人降鄆不書滅者取之遷之降之以為附庸而未絕其祀也

胡安國曰降者脅服之辭前書邾降于齊師意責魯也此言齊人降鄆專罪齊也鄆者紀之附庸微乎微者也齊人不道肆其強力脅使降附不書鄆降而曰降鄆者以齊人之強故罪之深以鄆之微故責之薄春秋之法扶弱抑強明道義也霸者之政以強臨弱

急事功也故曰五霸三王之罪人仲尼之徒無道桓文之事者

八月癸亥葬紀叔姬

謝湜曰紀叔姬之卒魯哀叔姬而葬之故書葬死能葬之而生不能安之以其有親親之心而無親親之道也紀被難魯不能救而紀侯去國叔姬窮無所託魯不能存而叔姬歸鄫魯無親親之道可知矣

胡安國曰滅國不葬此何以葬賢叔姬也紀侯既卒

不歸宗國而歸于鄗所謂秉節守義不以事故而睽
婦道者也故繫之于紀而錄其卒葬先儒謂賢而得
書是也賢而得書所以為後世勸

九月庚午朔日有食之鼓用牲于社冬公反齊侯遇于
魯濟

謝湜曰夏次于成冬過于魯濟著其非事勞民故也
呂祖謙曰謀山戎也以其病燕故也山戎在周為玁
狁在漢為匈奴在唐為突厥燕是北燕即今燕山南

府

齊人伐山戎

謝湜曰山戎病燕齊越千里出兵伐之得攘戎之義也

胡安國曰齊人者齊侯也其稱人譏伐戎也自管仲得政至是二十年未嘗命大夫為主將亦未嘗興大衆出侵伐故魯莊十一年而後凡用兵皆稱人者以將卑師少耳此安知其非將卑師少而獨以為齊侯

何也以來獻戎捷稱齊侯則知之矣夫北戎病燕職
貢不至桓公內無因國外無從諸侯越千里之險為
燕闢地可謂能修方伯連帥之職何以譏之乎桓不
務德勤兵遠伐不正王法以議其罪則將開後世之
君勞中國而事外夷舍近政而貴遠略困吾民之力
爭不毛之地其患有不勝言者故特貶而稱人以為
好武功而不修文德者之戒也然則伐楚之役何以
美之其謂退師召陵責以大義不務兵交而強楚自

服乎觀此可以見聖人強本治內柔服遠人之意矣
又曰古者不以蠻夷弊中國春秋內諸夏而外四夷
齊侯伐山戎為燕闢地貶而書人者勤遠略也

三十有一年春築臺于郎

謝湜曰宮室苑囿不足以遂游觀之樂故築臺于郎
胡安國曰何以書厲民也天子有靈臺以候天地諸
侯有時臺以候四時去國築臺于遠而不緣占候是
為游觀之所厲民以自樂也厲民自樂而不與民同

樂則民欲與之偕亡雖有臺其能獨樂乎

夏四月薛伯卒築臺于薛六月齊侯來獻戎捷

程氏學曰齊伐山戎得其捷齊侯躬來誇示以威我而聖人書曰來獻者抑之也强者抑之弱者扶之春秋大公之義也僖二十一年楚人使宜申來獻捷義與此同楚子稱人者尤以蠻夷始盛伐中國而誇其捷故貶而人之

謝湜曰軍事以捷爲功故勝敵爲捷詩曰一月三捷

是已以功告上爲獻獻臣子之禮也詩曰在泮獻功
是已齊之克山戎也齊侯躬以戎捷耀魯將以震動
小國而威之也春秋退抑齊侯而書曰來獻黜其強
也黜其強者不與大國以威陵諸侯也齊大國也來
獻戎捷卑者之事也以卑者屈辱齊侯而春秋抑強
扶弱之心見矣夫構禍邀功使生民陷于荼毒以好
戰者爲之患也沮直害忠使柔良困于沉溺以恃強
者爲之患也故春秋紀兵不美戰功其爲道也不與

強凌弱

胡安國曰軍獲曰捷凡諸侯有四夷之功則獻于王王以警于夷中國則否諸侯不相遺俘獻者下奉上之詞齊伐山戎以其所得躬來誇示書來獻者抑之也後世宰臣有不賞邊功以沮外徼生事之人得春秋抑戎捷之意

呂祖謙曰獻捷有二如襄八年邢丘之會鄭獲司馬燮獻捷于晉此謂獻囚之謂捷二十五年鄭伐陳子

產數俘而出此謂獻其功而不獻俘如齊獻捷是獻其俘也公羊以為威魯恐不如此

秋築臺于秦

謝湜曰害民以興土功耗財以供不急放心以事盤游作非法以遺後世乃一歲三築臺而後已莊公之過也

冬不雨

程頤曰一歲三築臺明年春城小穀故冬書不雨閔

之深也

謝湜曰不雨亦旱也謂之不雨者遠近僣雨洛嗟之辭也冬民種需雨之時天不為雨遠近咨嗟今乃土功不息而民事不以為念書不雨著莊公無恤民之心也謂之不雨者以明人事感動陰陽而天不為雨也前書三築臺後書不雨則天之不雨出于人事感動陰陽亦可見矣

三十有二年春城小穀

謝湜曰小穀管仲私邑城小穀齊之事也齊之事而魯人爲管仲城之不書齊譏公以齊國之事爲己國之事也冬不雨可憂而春猶以他國城築爲事公無恤民之心甚矣

夏宋公齊侯過于梁丘

謝湜曰遇無敵主故春秋因遇以正王爵

秋七月癸巳公子牙卒

謝湜曰牙以公子爲公室患稱公子著其骨肉相殘

也世子未立牙欲廢子立弟季友不以國法肆之市朝而以君命命之飲酖而死親親之道也故書卒

胡安國曰牙有無將之心而季子殺之其不言刺者公羊以為善之也季子殺母弟何善爾誅不得避兄君臣之義也曷為不直誅而酖之使託若以疾然親親之道也陸淳曰季子思義俱立變而得中夫子書其自卒以示無譏也得之矣

呂祖謙曰季友殺牙而不殺慶父何故蓋兄弟之間

既殺一人已是甚不得已安可又殺慶父蓋殺叔牙者但欲孤其黨爾

八月癸亥公薨于路寢

謝湜曰公薨必書其所謹凶變也遇弑則不地故也
莊公宣公成公薨于路寢正也僖公薨于小寢文公
薨于臺下襄公薨于楚宮定公薨于高寢不正也隱
公閔公不地以明不得其死也桓公薨于齊以明遇
禍于齊也昭公薨于乾侯以明客死于晉也路寢一

人之正寢也世子朝夕視膳之地也卿大夫宗族問安之所也國君考終于正寢則姦邪陰嬖無覬覦窺伺之心而邪謀息矣故曰薨于路寢正也

胡安國曰趙氏曰君終必于正寢就公卿也大位姦之窺也危病邪之伺也若蔽于隱是女子小人得行其志矣然則莊公世嫡承國不為不貴周公之後奄有龜蒙不為不强即位三十有二年不為不久薨于路寢不為不正而嗣子受禍幾至亡國何也大倫不

明而宗嗣不定兵柄不分而主威不立免其身幸矣

冬十月己未般卒

又見綱領中

謝湜曰嗣子立未踰年其位猶統于先君死則書卒不書地降成君也稱子不稱君一年不可二君故也未葬則名父前子名故也既葬則不名君道已伸故也子被弑不書諱之也莊公驕侈怠荒久矣上有星日可憂之變下有蜚蜮不虞之異方是時不知恐懼自省以求庶政乃有無名之次不義之圍非正之法

非法之如非禮之過加以勞民動衆工役累歲不休
失先王克謹天戒之意矣故前則喪師敗績于齊後
則叔牙慶父之難起而世子不得保其身繼以閔公
遇禍而社稷幾至危亡然則有國家者豈可不以畏
天為意者耶

胡安國曰初公築臺臨黨氏見孟任生子般焉般嘗
鞭圍人犖公薨般即位次于黨氏慶父使犖賊般成
季奔陳立閔公昔舜不告而娶恐廢人之大倫以懟

父母君子以爲猶告也莊公過時越禮謬于易基乾坤詩始闢睢大舜不告而娶之義甚矣而子般乃孟任之所出也胡能有定乎雖享國日久獲終路寢而嗣子見弑幾至亡國有國者可不以爲戒哉

呂祖謙曰共仲賊子般古人重于立家法亦非徒然魯自文姜以來家法不正生出許多禍亂弑桓般閔三君殺叔牙慶父二卿及哀姜一婦人皆因其淫亂至此如圍人之戲女公子莊公視以爲常相習以成

風而不以為事公曰不如殺之既為君自可殺之何必使他人殺之以見其昏弱之如此以文姜之事觀之見得曲禮內則皆非繁辭

公子慶父如齊

謝湜曰閔公雖立季友出奔魯國權出慶父故慶父結好于齊

胡安國曰子般之卒慶父弑也宜書出奔其曰如齊見慶父主兵自恣國人不能制也昔成王將終命大

臣相康王方是時掌親兵者太公望之子伋也宰臣
召奭命仲桓南宮毛取二千戈虎賁百人于伋以逆
嗣子伋雖掌兵未有宰臣之命不敢發也召公雖制
命非二諸侯將命以往伋亦不承也兵權散主不偏
屬于一人可知矣今莊公幼年即位專以兵權授之
慶父歲月既久威行中外其流至此故于餘丘法不
當書而聖人特書慶父帥師以志得兵之始而卒書公
薨子般卒慶父如齊以見其出入自如無敢討之者

以示後世其垂戒之義明且遠矣

狄伐邢

謝湜曰中國德威不振故狄為邢難

呂祖謙曰桓公始霸之初狄滅衛又伐邢見得當時外服憑陵中國如此之甚向非桓公封衛遷邢則中夏之淪胥正不知伊于胡底孔子所以于桓之霸多與詞也豈獨漢陽諸姬盡於強楚哉

春秋集義卷十六

欽定四庫全書

春秋集義卷十七

宋 李明復 撰

閔公

程頤曰閔公名開莊公子惠王十六年即位閔謚也
在國逢難曰閔

元年春王正月

謝湜曰莊公薨子般遇難其位不得受之先君故不

書即位

胡安國曰不書即位內無所承上無請命也莊公薨子般卒慶父夫人利閔公之幼而得立焉是內不承國于先君也按周制王哭諸侯則大宗伯爲上相未有諸侯之薨而不告于王者也職喪掌諸侯之喪以國之喪禮涖其禁令序其事凡國有司以王命有事焉則詔贊主人未有諸侯之子主喪而王不遣使是上不請命于天子也內無所承上不請命故不書即

位正人道之大倫也

齊人救邢

謝湜曰邢小國齊救邢大國之義也

胡安國曰凡書救者未有不善之也救在京師則罪列國子突救衛是也救在夷狄則罪諸侯狄救齊吳救陳是也救在遠國則罪四鄰晉陽處父帥師伐楚以救江是也救而不速救者則書所次以罪其慢叔孫豹救晉次于雍榆是也救而不敢救者則書所至

以罪其怯齊侯伐我北鄙圍成公救成至遇是也兵者春秋之所甚重衛靈公問陳孔子對曰俎豆之事則嘗聞之矣軍旅之事未之學也獨至于救兵而書法若此聖人之情見矣其稱人將卑師少也

夏六月辛酉葬我君莊公

謝湜曰國亂故十一月乃葬

秋八月公及齊侯盟于落姑

謝湜曰左氏謂盟復季友蓋閔公之立賴季友維持

故公與齊盟而復之

呂祖謙曰是時閔公方七八歲安能自會如此蓋緣國人上下皆惡慶父而賢季友故欲復之如公與齊盟亦國人左右扶持他去雖當時國亂猶能惡慶父而復季友此亦見魯秉周禮處

季子來歸

程氏雜說曰閔元年秋季子來歸莊公既薨子般被殺魯國方危而慶父未討公子子友賢而在齊國人思

得以安社稷故公為落姑之盟以請復而來歸書曰
季子而不名異其文以嘉之也

謝湜曰公子將亂魯而季友以命誅之世子之位將
傾而季友以力扶之季友忠于社稷可知也子般遇
禍閔公冲幼逆賊未討而內難未寧方是時得季友
則社稷可安不得季友則社稷可危觀落姑之盟思
得季友以寧魯國則國人倚賴季友之心可見矣故
季友之反國也書曰季子嘉之也書曰來歸美之也

胡安國曰按左氏盟于落姑請復季友也其曰季子賢之也其曰來歸喜之也自外至者為歸是嘗出奔矣何以不書莊公薨子般弑慶父主兵勢傾公室季子力不能支避難而出奔恥也魯國方危內賊未討國人思得季子以安社稷而落姑之盟以請于齊則是賢也春秋欲沒其恥故不書奔欲旌其賢故特稱季子聖人之情見矣隱惡而揚善舜也樂道人之善惡稱人之惡孔子也為尊者諱為親者諱為賢者諱

春秋也明此可以畜納汙之德樂與人爲善矣其不稱公子見季友自以賢德爲國人所與不緣宗親之故也堯敦九族而急親賢退嚚訟周厚本支而庸旦仲黜蔡鮮義皆在此而親親之殺尊賢之等著矣此義行則內無貴戚任事之私外無棄親用羈之失而國不治者未之有也此春秋待來世之意

又曰春秋不與公族大夫專政用事而以親賢爲急季子來歸不稱公子者言其自有賢德爲國人所喜

不獨緣貴戚之卿此有國家者之所急也

朱熹語錄或問季友之爲人曰此人亦多可疑諸家
多言季友來歸爲聖人美之之辭據熹看此一句正
是著季氏所以專國爲禍之基季友之罪與慶父不
爭多但歸後能平難魯人歸之故如此說況世執魯
之大權人自是畏之史官書得如此好孔子因而存
此蓋以見其執權之漸耳

冬齊仲孫來

程頤曰冬齊仲孫來左氏紀其事曰齊仲孫湫來省
難書曰仲孫嘉之也仲孫歸曰不去慶父魯難未已
公曰若之何而去之對曰難不已將自斃君其待之
公曰魯可取乎對曰不可猶秉周禮周禮所以本也
君其務寧魯難以親之考之經意為合不曰齊侯使
而直曰仲孫來者齊侯使來觀魯而使于我也曰仲
孫其字也時莊公新薨嗣子既弒閔公方立慶父猶
在國之危也甚矣向使齊取魯易于反掌而仲孫能

俾齊侯務寧魯難有全國之功故特書其字以褒之
謝湜曰仲孫齊大夫湫其名仲孫其字也齊侯使仲
孫來省難有窺魯之心焉仲孫告齊侯以去慶父親
有禮因重固有恤魯之心焉方是時閔公幼弱慶父
凶逆使桓公搖足于齊則魯國千乘之封不待兵革
相交而束手入齊矣仲孫不乘危以幸功不襲災
以生變乃能使齊侯寧魯難而親之其安邦全國之
功大矣故仲孫之至魯也書仲孫而不名嘉之也直

書來顯仲孫惡齊侯也仲孫之出非齊侯使來恤我也齊侯使來聘我也春秋上不書使而仲孫安魯之功由此見矣下不書聘而齊侯窺魯之心由此見矣胡安國曰仲孫齊大夫也其不稱使而曰來者略其君臣之常詞以見桓公使臣不以禮仲孫事君不以忠也按左氏齊侯憂魯使仲孫來省難何以言使臣不以禮也鄰有弑逆則當聲罪戒嚴修方伯職以奉天討而更使計謀之士窺覘虛實有乘亂取國之心

則使臣非以禮矣仲孫歸曰不去慶父魯難未已君
其務寧魯難而親之何以言事君不以忠也田恒弑
簡公孔子沐浴而朝告于哀公請討焉豈曰齊人方
強姑少待之也不勸其君急于討賊而俟其自斃則
事君非以忠矣使慶父稔惡閔公再弑則桓公與仲
孫始謀不臧之所致爾直書曰齊仲孫來交譏之也
胡宏曰二帝三王施仁政定天下盡道而已非有利
天下之心也五霸仗義結信摟諸侯獎王室謀以自

強大非有正天下之心也五霸桓公為盛忿不懲而滅譚慾不窒而窺魯其心源可考矣雖力行信義豈其如日之晝如月之夜不可離乎使其無死安知其不志驕氣溢而後有失信棄義之事哉惟其執之不敢中道廢是以得成霸者之名爾此孟子之所謂假也今有人假人之器以為用方其用也謂之非已用可乎為已用矣謂之文具而實不從可乎用之未歸以至于沒身孰曰非已有乎五霸假信義而未歸則

既有之矣其得罪于三王何也以其有爲而爲之也
此王霸所以分乎

二年春王正月齊人遷陽

謝湜曰陽微國齊偪而遷之故曰遷陽上尊王室下
撫列國天下可合而一諸侯可臣而役也桓公務殖
土地為一國私計而已或降郵或遷陽皆迫而并之
非心服也故諸侯或叛或從夷狄或順或逆而不純
乎先王之業也

夏五月乙酉吉禘于莊公

程頤曰天子曰禘諸侯曰祫其禮皆是合祭之義禘從帝禘其祖之所自出之帝以所出之帝為東向之尊其餘合食于其前是為禘也諸侯無所出之帝只是于太祖廟羣廟之主合食是為祫魯所以有禘者只為得用天子禮樂故于春秋之中不見言祫只言禘言大事者即是祫言大事于太廟躋僖公即是合食閔僖二公之義若時祭當言有事吉禘于莊公只

是禘祭言吉者以其行之太早也四時之祭有禘之名是禮文交錯

張載曰禮不王不禘則知諸侯歲闕一祭為不禘明矣至周則以祠為春以禴為夏宗廟歲六享則二享四祭為六矣諸侯不禘其四享歟故夏商諸侯夏時一禘王制謂禘則不禘禘則不嘗假其名以見時祀之數爾作記者不知文之害意過矣禘于夏周為春夏嘗于夏周為秋冬作記者交舉二氣對互而言耳

享嘗云者享為追享朝享禘亦其一耳嘗以配之亦對舉秋冬而言也夏商以禘為時祭如追賞之必在夏也然則夏商天子歲乃五享禘列四祭并禘而五也周改禘為禴則天子享六諸侯不禘又歲闕一祭則亦四而已矣王制所謂天子禘牲禘禘嘗禘烝既以禘為時祭則禘可同時而舉所以物薄而牲從舊諸侯禘牲如天子禘一牲一禘言于夏禘之時止于一祭特一禘而已然則不王不禘又著見于此矣下又云嘗

禘烝禘則嘗烝且禘無疑矣若周制亦嘗闕一時之祭則當云諸侯祠則不禴禴則不嘗云

又曰禮不王不禘禘字從帝則是推本必至于生物之帝也在古則但推之于所出之帝若言報本則庶人得祭天故聖人制法以禘獨歸之王者不如是人皆可以祭天禘者合祭羣廟之主禘則既祭及于毀廟雖百世皆祭又禘其所出之祖最為大祭

謝湜曰魯禘之失者三諸侯而行禘禮其失一也禘

不于太祖而于莊公其失二也二十二月而吉祭其失三也其功大者其禮備其德盛者其澤遠王者兼天下之奉備萬物之養故親親之仁尊尊之義上達于始祖故禮不王不禘諸侯而行禘禮僭祭之大者也新主入廟則親盡之主入祧新主驟而入廟居處弗安親盡之主驟而出廟子孫之心悽惻故先王因設大禘會羣主相見于廟而叙昭穆以享之享禮既終新主隨親主入廟親盡之主隨毀廟之主入祧如

是而後死生安焉故喪畢而禘近以奉安新主遠以奉遷親盡之主者也故禘必于太祖之廟禘不于太祖而于莊公失禮之大者也生事畢而死事始喪事畢而鬼事始哀戚未終而吉事舉焉乃人子無三年之愛于其親也故孝子三年哀慕哭泣上食上飲一以生禮事之二十二月而吉祭忘哀之大者也莊公未可以稱宮廟故不書宮

胡安國曰天子曰禘諸侯曰祫其禮皆合祭也禘者

禘其所自出之帝為東向之尊其餘皆合食于前此之謂禘諸侯無所出之帝則止于太祖之廟合羣廟之主以食此之謂禘天子禘諸侯禘大夫享庶人薦上下之殺也魯諸侯爾何以有禘成王追念周公有大勲勞于天下賜魯公以天子禮樂使用諸太廟以上祀周公魯于是乎有禘祭春秋之中所以言禘不言禘也然則可乎孔子曰魯之郊禘非禮也周公其衰矣禘言吉者喪未三年行之太早也于莊公者方

祀于寢非宮廟也一舉而三失禮焉春秋之所謹也
四時之祭有禘之名蓋禮文交錯之失

朱熹曰禘天子宗廟之大祭追祭太祖之所自出于
太廟而以太祖配之也

呂祖謙曰吉禘于莊公禘有兩般有常禘有三年喪
畢而後禘襄十五年晉悼公卒十六年晉人荅魯穆
叔云以寡君之未禘祀知是三年喪畢乃為禘也喪
畢而為禘祭如致新死之主于廟也僖八年禘于太

廟宣八年有事于太廟皆是常祭

秋八月辛丑公薨

謝澁曰遇難故不地賊不討故不書葬

胡安國按左氏初公傳奪卜齧田公不禁慶父使卜齧賊公于武闈魯史舊文必以實書其曰公薨不地者仲尼親筆也觀于刪詩在諸國則變風皆取在魯則獨編史克之頌或問吾黨有直躬者其父攘羊而子證之則曰吾黨之直者異于是父為子隱子為父

隱直在其中矣後世緣此制為五服相容隱之條以綴骨肉之恩春秋有諱義蓋如此禮記稱魯之君臣未嘗相弑蓋習于經文而不知聖人書薨不地之旨故云爾然則諱而不言弑也何以傳信于將來曰書薨以示臣子之情不地以存見弑之實何為無以傳信也凡君終必書其所獨至于是弑則没而無所其情厚矣其事亦白矣非聖人能修之乎後世記言之事欲諱國惡則必失其實直書無隱又非臣子所當

施之于君父也而春秋之法不傳矣

呂祖謙曰共仲使卜齮賊公于武闈閔公見弑雖出于不測亦是季友失照管處

九月夫人姜氏孫于邾

謝澍曰閔公之死哀姜與知故哀姜避難出奔書孫諱之也哀姜閔公之母也哀姜雖有與知殺子之罪而無危害社稷之心其罪固大矣而義未絕于魯也故其出奔也春秋存其姜氏而未加絕也文姜哀姜

王法皆在所治也然文姜以妻得罪于君者也哀姜以母得罪于君者也哀姜之罪與文姜異矣故春秋立法不同男女人倫之本也男女不正則亂生故文姜至不以禮而其終襄公之難發于齊哀姜入不以禮而其終慶父之難發于魯春秋志其亂禮于前而著其產禍于後所以為天下戒也

胡安國曰夫人稱孫聞乎故也不去姓氏降文姜也莊公忘親釋怨無志于復讎春秋深加貶絕一書再

書屢書而不諱者以謂三綱人道所由立也忘父子之恩絕君臣之義國人習而不察將以是為常事則亦不知有君之尊有父之親矣莊公行之而不疑大臣順之而不諫百姓安之而無憤疾之心也則人欲必肆天理必滅故叔牙之弑械成于前慶父之無君繼動于後圍人犂卜齧之刃交發于黨氏武闔之間哀姜以國君母與聞乎故而不忌也當是時魯君再弑幾至亡國其應不亦惜乎春秋以復讎為重而書

法如此所謂治之于未亂保之于未危不可不察也
公子慶父出奔莒

謝湜曰慶父通國母弑二君季友力未能討故慶父
出奔公羊謂緩追逸賊親親之道誤矣慶父國之大
逆慶父雖縊不以國法正其罪而絕之與賊不討同
故慶父死不書刺

胡安國曰公子出奔譏失賊也閔公立而季子歸何
以見弑慶父主兵日久其權未可遽奪也季子執政

日淺其謀未得盡行也設以聖人處之期月而已可也季子賢人而當此能必克乎及閔公再弑慶父罪惡貫盈而疾之者愈衆季子忠誠顯著而附之者益多外固強齊之援內協國人之情正邪消長之勢判矣然後夫人不敢安其位慶父不得肆其姦此明爲國者不知圖難于其易爲大于其細雖有智者亦不能善其後矣世儒或言用魯之衆因齊之力以戮慶父其勢甚易而季子不能故書夫人孫邾慶父奔莒

所以深惡其緩不討賊則非也以絳侯勃之果陳平
之無懼將相交懼而內有朱虛外連齊楚以制諸呂
庸人宜易于反手然太尉已入北軍士皆左袒猶恐
不勝未敢誦言誅之也況于慶父巨姦七百里之侯
國革車千乘而三十年執其兵柄其植根深矣其耳
目廣矣其用物宏矣而以為戮之其勢甚易此未察
乎難易遲速之幾者也經書莊公忘親無復讎之志
使百官則而象之亦不知有君父也而又使慶父主

兵失馭臣之道是以此極故書孫邾奔莒為後世之永鑒也

呂祖謙曰季友既出魯似無人他何故奔只緣共仲罪大惡極國人不容不得不出觀此亦可見魯秉周禮處

冬齊高子來盟

程頤曰高子來省難然後盟盟未前定也稱高子善其能卹魯

程氏學曰齊高子來盟不書名褒之也不稱使者齊侯使來視魯而未定盟高子至魯而後結盟爾有安危存亡之功故特書子子者男子之美稱所以善之也春秋章善瘡惡一字為褒貶非聖人孰能修之此與仲孫來事義略同

謝湜曰禍莫大于篡弑危莫大于無君魯國兩遭弑逆其難可謂大矣齊桓職為盟主國為鄰國輔新主以固民心除凶類以消國孽侯伯之職也為齊桓者

無恤魯之心也特使高傒出視魯難而已高傒至魯
然後結盟以定僖公由是大難賴之以息魯國賴之
以安其存亡繼絕之功大矣故高傒之盟于我也書
曰高子嘉之也書來盟不書使以明存魯之功出于
高子也子男子之美稱季友高傒皆曰子以褒功也
般卒之後慶父如齊閔薨之後慶父奔莒齊桓無救
魯之心于此見矣仲孫之來高子之盟皆不言使齊
桓無安魯之心于此見矣

胡安國曰高子齊大夫也子者男子之美稱其稱子
賢之也何賢乎子莊公薨般卒閔公弑慶父夫人亂
乎內魯于是曠年無君齊桓公使將南陽之甲至魯
而謀其國其命高子必曰魯可取則兼其國以廣地
魯可存則平其亂以善鄰非有安危繼絕一定不可
易之計也高子至則平魯難定僖公魯人賴焉以為
美談至于久而不絕曰猶望高子也聖人美其明人
臣之義得奉使之宜特稱高子以著其善其不曰齊

侯使之者權在高子也

十有二月狄入衛

謝湜曰荆之伐鄭也齊人救鄭而已未有討荆之伐也狄之伐邢也齊人救邢而已未有討狄之伐也故狄復入衛則其為患非特伐邢而已載馳傷衛懿公為狄人所滅定之方中美衛文公徙居楚丘然則狄之入衛也國人分散衛已滅矣自文公徙居楚丘建城市營宮室而衛國復興則狄未能滅衛而有之故

入衛不書滅

胡安國曰衛康叔之後蓋北州大國狄何以能入乎
臣昔嘗謂河南劉奕曰史氏記煩而志寡如班固書
載諸王淫亂等事盡削之可也奕曰必若此言仲尼
刪詩如墻有茨鴟之奔奔桑中諸篇何以錄于國風
而不削乎臣不能答後以問延平楊時時曰此載衛
為戎狄所滅之因也故在定之方中之前因以是說
攷于歷代凡淫亂者未有不至于殺身敗家而亡其

國者也然後知古詩垂戒之大而近世有獻議乞于
經筵不以國風進讀者殊失聖經之旨矣

鄭棄其師

程氏雜說曰鄭詩清人刺文公也高克好利而不顧
其君文公惡而欲遠之不能使高克將兵而禦狄于
境陳其師旅翱翔河上久而不召衆散而歸高克奔
陳公子素惡高克進之不以禮文公退之不以道危
國亡師之本故作是詩也顧此詩序則鄭棄其師灼

然著矣

楊時曰閔二年書鄭棄其師觀清人之詩序可見矣
文公惡高克使之將兵禦狄久而不召遂使衆散而
歸豈非棄其師乎蓋惡其人而使之將兵外之兵何
罪故止罪鄭

謝湜曰鄭師衆散而歸非師潰也鄭棄之也將庸而
委之師師老而無還棄師之道也國以師為本師存
則國安師亡則國危師而棄之是棄國也其為患豈

特一高克哉書曰鄭棄以不智罪鄭而危之也

胡安國曰按鄭詩清人刺文公也高克好利而不顧其君文公惡之而不能遠使高克將兵禦敵于境陳其師旅翱翔河上久而不召衆散而歸高克奔陳公子素惡高克進之不以禮文公退之不以道危國亡師之本故作是詩觀此則鄭棄其師可知矣或曰高克進不以禮曷不書其出奔以貶克為人臣之戒而獨咎鄭伯何也曰人君擅一國之名寵生殺予奪惟

我所制爾故克不臣之罪已著按而誅之可也情狀未明黜而遠之可也愛惜其才以禮馭之可也烏有假以兵權委諸境上坐視其什伍離散而莫之恤乎然則棄師者鄭伯乃以國稱何也二三執政股肱心膂休戚之所同也不能進謀于君協志同力黜逐小人而事至此是謂危而不持顛而不扶則將焉用彼相矣晉出帝時延廣專權諸藩擅命及桑維翰為相出延廣于外一制書所敕者十有五鎮無敢不從者

以五季之末維翰能之而鄭國二三執政畏一高克不能退之以道何政之為書曰鄭棄其師君臣同責也

呂祖謙曰鄭人使高克帥師次于河上他何故次于河上蓋當時狄既滅衛聲勢甚大却節次須為防備衛在河北鄭在河南其相去亦甚近

春秋集義卷十七

欽定四庫全書

春秋集義卷十八

宋 李明復 撰

僖公

程頤曰僖公名申莊公子閔公庶兄惠王十八年即位僖謚也小心畏忌曰僖

元年春王正月

謝澁曰閔公遇難其位不得受之先君故不書即位

季友不死子般閔公之難不能速討逆賊固有責矣
然去叔牙奉子般以正國嗣立僖公遂慶父以安社
稷友之力也

胡安國曰不書即位內無所承上不請命也閔公薨
夫人孫于邾慶父出奔莒公于是焉以成風所屬而
季子立之內無所承也嗣子定位于初喪而魯使不
告于周明年正位改元而周使亦不至于魯又明年
服喪已畢而不見於京師上不請命也承國于先君

者父子之倫請命于天王者君臣之義今僖公內無
所承上不請命不書即位正王法也是故有四海而
即天王之位者受之于天者也有一國而即諸侯之
位者受之于王者也受之于天者必奉若天道而後
能保天下受之于王者必謹守王度而後能保國
齊師宋師曹師次于聶北救邢

程頤曰齊未嘗興大衆此稱師責其衆可救而徒次
以為聲援致邢之不保其國也

或問程頤邢衛為狄所滅齊桓公攘戎狄而封之當時夷狄橫而中國微桓公獨能如此故孔子曰微管仲吾其被髮左衽矣為其功如此也觀晉室之亂劉石猖獗于中原當是時只為無一管仲故顛沛如此然則管仲之功後世誠難及也曰若以後世論之其功不可謂不大自王道觀之則不足以為大也今人只為見管仲有此故莫敢輕議不知孔孟有為規模自別見得孔孟作處則管仲自小曰孔孟如何曰必

也以天保以上治內以采薇以下治外雖有夷狄安得遽至中原乎如小雅盡廢則政事所以自治者俱亡四夷安得而不交侵

程氏學曰齊師宋師曹師次于聶北救邢言救邢謂其志于義也言次于聶北以見其不及事故夏六月邢遷于夷儀其不及事尤可見矣齊師宋師曹師城邢其志于義尤可見矣春秋之時諸侯交亂爭地以戰殺人盈野爭城以戰殺人盈城又況于蠻夷猾夏

者哉然而天子不能正方伯不能討當是之際有能
奔命而救之者雖行師不出于天子未合于王道之
正而權事度情亦云善矣可不與之哉凡書救者皆
善之也其間輕重褒貶則各存乎其文矣

胡安國曰三國稱師見兵力之有餘也聶北書次以
譏救邢之不速也春秋大義伐而書次其次為善遂
伐楚次于陘美之也救而書次其次為貶救邢次于
聶北譏之也聖人之情見矣故救患分災于禮為急

而好攻戰樂殺人者于罪為大

又曰春秋以用兵侵伐為戒獨至于救患分災惟恐次止遷延而欲其速也故伐而書次者其次為善次于陘美之也救而書次者其次為貶次于聶北譏之也以此見聖人之情矣

呂祖謙曰諸侯救邢初間狄伐邢齊已救了今何故又救邢蓋初間救邢之時狄人雖退却去伐衛衛與邢相近狄既滅衛後遂乘滅國之威又去伐邢所以

桓公帥諸侯之師再去救邢然不便去救邢却次于
聶北而又不速進師者何故蓋桓公是霸主夷狄與
中國相為盛衰勝負于此乎分萬一小敗狄人便自
此來侵中國此不得不謹所以未敢輕發直待邢潰
是突圍而出方敢乘其勢亂而救之

又曰齊桓公始霸之初狄滅衛又伐邢見得當時夷
狄凌中國如此之甚向非齊桓之霸封衛遷邢則中
國幾何而不淪胥為夷狄此孔子所以有微管仲吾

其被髮左衽之嘆也

夏六月邢遷于夷儀齊師宋師曹師城邢

謝湜曰邢有狄難諸侯帥師救之邢遷夷儀諸侯帥師城之邦國之義也雖然以三國師衆之盛可以攻狄而攘之矣次于聶北而後進焉則其救邢緩而不急也救難如救溺緩而不急則失救之道矣邢之受禍如在水火之中也三國次于境上至于六月不進而狄無退心師至其國則邢人已為兵刃之血矣故邢

迫危亡以至遷于夷儀邢之遷三國緩師之過也與其次而後救不若不次之為善也與其遷而後城不若不遷之為善也力足以討暴折難而遷延後時故聶北之師書救書城以著其善書次書遷以著其惡胡安國曰書邢遷于夷儀見齊師次止緩不及事然邢以自遷為文而再書齊師宋師曹師城邢者美桓公志義卒有救患之功也不以王命興師亦聖人之所與乎中國衰微夷狄猾夏天子不能正至于遷徙

奔亡諸侯有能救而存之則救而存之可也以王命興師者正能救而與之者權

秋七月戊辰夫人姜氏薨于夷齊人以歸

謝湜曰夷齊地哀姜薨于夷齊桓取而殺之也齊人以歸者以哀姜之喪歸于齊也哀姜之得罪也以母與知殺子而已義未絕于魯也哀姜之罪天王在所治為天吏者可得而誅也桓公父母之國也宜以親親之恩為之隱也以罪討而殺之非父母國之道也

身未絕于魯而齊人以歸非父母國之義也殺非其
殺歸非其歸齊失正也哀姜出奔書曰夫人姜氏孫
于邾為之諱其奔也其見殺也書曰夫人姜氏薨于
夷為之諱其殺也其喪至也書曰夫人氏之喪至自
齊其葬也書曰葬我小君哀姜觀春秋所書則哀姜
于魯可知矣

胡安國曰夫人薨不地其曰薨于夷何也桓公召而
殺之也其曰齊人以歸者以其喪歸于魯也齊為盟

主義得舉法是霸者之所以行乎諸侯也既誅其人
又歸其喪何居魯欲拒而勿受乎則子無讐母之義
受而葬之乎已絕者復得享小君之禮典刑紊矣故
特書以歸而不曰歸夫人之喪以者不以者也

楚人伐鄭

謝湜曰楚入春秋爵號不通中國故莊公之世楚惟
稱荆至其一來修聘始進稱人僖公初政令與中國
相通荆始改號稱楚自此用兵侵伐皆進稱人方是

時楚雖益熾齊桓能制其強故終桓之世楚惟稱人而不與中國會盟及桓之歿也其權勢與中國相抗始以人會列國盟于齊又以人會列國盟于鹿上至孟之會執宋公伐宋楚遂書爵而位列陳蔡上以示楚日强大而中國不能制也自是楚見于經皆與中國並故君則稱爵卿則稱名其官稱大夫其爵稱公子衆則稱師微則稱人或以示貶或名以示絕赴告之禮行而書卒書名聘問之禮詳而書卿書使以楚

之禮法皆循中國故也

胡安國曰楚稱人寢強也莊公十年敗蔡師虜獻舞固已強矣然獨舉其號者始見于經則本其僭竊之罪正其夷狄之名著王法也二十三年來聘嘉其慕義乃以人書二十八年伐鄭惡其猾夏復以號舉至是又伐鄭也亦書人者豈許其伐國而人之乎會中華執盟主朝諸侯長齊晉其所由來者漸矣

八月公會齊侯宋公鄭伯曹伯邾人于櫟

謝湜曰左氏謂謀救鄭檉宋地

九月公敗邾師于偃

謝湜曰哀姜之死魯人歸怨于邾故公敗邾師

胡安國曰檉之會謀救鄭而公與邾人咸與焉則是志同而謀協也今既會邾人于檉又敗邾師于偃于此責公無攘夷狄安中國之誠矣凡此皆直書其事而義自見也詐戰曰敗敗之者為主

冬十月壬午公子友帥師敗莒師于鄆獲莒挈

謝湜曰慶父魯之逆臣莒人以慶父之賂興師不義之大也出不以義進不量力故公子友敗莒師獲莒拏莒大夫之帥師者也大夫師敗而身獲于人不智之大也書獲罪之也列國大夫皆王臣也以戰為事而獲人之卿公子友之罪也度德量力用師之道也不義不智而身獲于人莒拏之罪也酈之敗曲在莒已明故不書伐

胡安國曰按公羊慶父走莒莒人逐之將由乎齊齊

人不納却反舍于汶水之上奚斯入請不可而死莒
人曰吾已得子之賊以求賂乎魯魯人弗與為是興
師而來伐然則罪在莒也而以季友主此戰何也抑
鋒止銳喻以辭命使知不縮而引去則善矣今至于
兵刃既接又用詐謀擒其主將此強國之事非王者
之師春秋之志故以季友為主而書敗獲責之備也
十有二月丁巳夫人氏之喪至自齊

謝澍曰齊人以姜之尸歸僖公請而葬之書至自齊

著齊之惡也不稱姜杜氏謂之闕文是也以為貶絕亦不當書氏且夫人之罪未在所絕故也

胡安國曰夫人與弑二君幾于亡國大義已絕不可復入宗廟矣書孫于邾薨于夷者絕哀姜也書齊人以歸夫人氏之喪至自齊者譏桓公也不稱姓者殺于齊不去氏者受于魯

張栻語錄或論哀姜之孫不去姜氏者將以別于文姜也然般閔再弑魯國幾亡其禍亦慘矣子雖不可

以讐母以先君治之夫豈不可故夫人喪至自齊也
因告至于廟遂去其姓猶存其氏者終有別于文姜
也所謂毫釐有所必計者也

呂祖謙曰君子以齊人之殺哀姜也為已甚矣哀姜
于魯大義絕論來魯之臣子當正罪討之于未立君
之前若閔公既立之後亦難討之齊則不當殺魯不
敢殺所以取而殺之

二年春王正月城楚丘

楊時曰齊桓公攘戎狄而封衛未嘗請命于天子而專封之也故春秋書城楚丘而不言其封衛蓋無取焉然則木瓜美桓公孔子何以取之曰木瓜之詩衛人之詩也衛為狄所滅桓公救而封之其恩豈可忘也欲厚報之不亦宜乎在衛人之義不得以為美其取之也以衛人之義而已若春秋褒貶示天下之公故無取

謝湜曰楚丘衛邑衛為狄所滅野處漕邑諸侯為之

城楚丘而封焉楚丘不書衛善魯人視楚丘猶已國之事而城之也諸侯救災恤隣義也勞民以供鄰役非義也城楚丘諸侯之事也魯為之城義也故魯城楚丘不書衛善其視衛之患如已國之患也城小穀齊之事也魯為之城非義也故魯城小穀不書齊議其以齊之事為已國之事也衛之出于漕也詩稱齊桓公攘戎狄而封之然則城楚丘齊之功諸侯之力也不書諸侯者齊桓以威率諸侯而城之諸侯心力

未齊故也城不書諸侯而齊桓未能悅服諸侯由此見矣城邢邢既危而後安之者也城楚丘衛既亡而後存之者也邢危而後安之衛亡而後存之雖有安存之力已失安存之道矣故齊桓攘戎狄保邦國雖若安邢存衛春秋皆不美其功也前書狄入衛後書城楚丘則春秋不美齊桓其心見矣夷儀邢已遷故城書邢楚丘衛未遷故城不書衛

胡安國曰楚丘衛邑桓公帥諸侯城之而封衛也不

書桓公不與諸侯專封也木瓜美桓公而夫子錄之意豈異乎不與專封正王法也木瓜有取焉善衛人之情也曷為善之報者天下之利以德報德則民有所勸矣城楚丘略而不書城邢詞繁而不殺何也按周制凡封國大宗伯賓司几筵設黼宸內史作冊命是天子大權非諸侯所得擅而行之者也衛人渡河野處漕邑許穆夫人閔其亡而載馳賦文公徙居楚丘而後百姓悅則其國固嘗亡滅而不存矣城楚丘

是擅天子之大權而封國也邢遷于夷儀經以自遷
為文則其遷出于己意其國未嘗滅也諸侯城邢是
謂同惡相恤以從簡書故詞繁而不殺美救患也桓
公封衛而衛國忘亡其有功于中華甚大為利于衛
人甚博宜有美詞以揚其事今乃微之若此者正其
義不謀其利明其道不計其功略小惠存大節春秋
之法也故曰五霸三王之罪人仲尼之徒無道桓文
之事者

朱熹曰春秋

闕

地

呂祖謙曰封邢如何却在遷邢之後蓋狄滅衛後盤旋邢衛之間桓公下手未得所以逐狄之緩待狄都退後方城楚丘其勢是如此

夏五月辛巳葬我小君哀姜虞師晉師滅下陽

程頤曰虞假道而助晉伐虢虢之亡虞實為之故以虞為主下陽邑也虢之亡因此故先書虞

程氏學曰虞師晉師滅下陽晉主乎伐虢而虞為首

何也受賂假道以師同伐虢故以虞為首也下陽虢
邑也邑不言取而云滅者趙氏謂虢因而亡也不于
滅而書之著虞罪也此義明矣蓋不為道則晉不得
逞下陽既喪而虢遂滅矣聖人所書微旨可見也

謝湜曰下陽虢之塞邑也邑不言滅下陽謂之滅者
下陽入晉而虢因以亡故下陽書滅以著虢滅之由
也著虢滅之由所以罪虞也伐虢晉獻公之謀也然
晉師得至于虢以虞為道晉師得取下陽以虞為主

然則虢亡皆起于虞故下陽之難以虞先晉而首其惡也虢同姓之國也虞晉滅虢不名者方下陽之亡虢實未滅故也虞公貪暴君之賂而假之道合兩國會焉

胡安國曰按孟子晉人以垂棘之璧與屈產之乘假道于虞以伐虢宮之奇諫百里奚不諫然則晉人造意以虞首惡何也貪得重賂遂其強暴以滅兄弟之國以及其身而亡其社稷所以為首乎春秋聖人律

令也觀此義可以見法矣唐高祖賜其臣長孫無忌
金寶繒錦欲以立武昭儀雖無忌終不順旨君子猶
譏其後于利而不反君賜也矧受他人之賂遂其強
暴者乎國而曰滅下陽邑爾其書滅何也下陽虞虢
之塞邑猶秦有潼關蜀有劍嶺皆國之門戶也潼劍
不守則秦蜀破下陽既舉而虞虢亡矣春秋此義以
天下為家以城郭溝池為固以山川丘陵為險設之
以守國而待暴客者也其衰世之意耶

呂祖謙曰此一事知宮之竒之諫必不聽知虞之必可假知虢之必可亡料敵如見自是觀之晉國智謀之士如息者亦自有數至于傅奚齊此段全不能知却不能先為保護之計何料敵如是之審謀國如是之疎蓋息本非就自身上做工夫專以億度揣摩為事故有著不著處

又曰晉荀息何故知虞有宮之竒蓋荀息是獻公謀臣平日欲經營諸國亦魯下工夫所以知得言其懦

不能強諫蓋他國雖有謀臣若是昏闇之人則不能
知此非止得宮之竒之為人亦是知得虞之情性所
以說冀一段以誇大之

秋九月齊侯宋公江人黃人盟于貫

胡安國曰按左氏盟于貫服江黃也荆楚天下莫強
焉江黃者其東方之與國也二國來定盟則楚人失
其右臂樂毅下齊先結韓趙孔明伐魏申好江東雖
武王牧野之師亦誓友邦遠及庸蜀彭濮八國之人

共為犄角之勢也桓公此盟其服荆楚之慮周矣其攘夷狄免民于左衽之義著矣盟雖春秋所惡然諸侯皆在獨言遠國者許是盟也

呂祖謙曰先理會小者却去理會楚

冬十月不雨

楚人侵鄭

呂祖謙曰齊楚何故欲爭鄭蓋鄭介乎兩間齊得鄭則齊強楚得鄭則楚強

三年春王正月不雨夏四月不雨

胡安國曰穀梁子曰不雨者勤雨也每時而一書閔雨也閔雨有志乎民者也歷時而總書不憂雨也不憂雨者無志乎民者也按詩稱僖公儉以足用寬以愛民務農重穀則誠賢君也其有志乎民審矣故冬不雨而書春不雨而書夏不雨而書以著其勤也文公以練祭則緩于作主以宗廟則太室屋壞以賦政則四不視朔以邦交則三不會盟其無志乎民亦審

矣故自十有二月不雨至于秋七月而書自正月不雨至于秋七月而書以著其慢也

徐人取舒六月雨

胡安國曰雨云者喜雨也閔雨與民同其憂喜雨與民同其樂此君國子民之道也觀此義則知春秋有懼天災恤民隱之意遇天災而不懼視民隱而不恤自樂其樂而不與民同也國之亡無日矣

秋齊侯宋公江人黃人會于陽穀

胡安國曰按左氏謀伐楚也或曰侵蔡次陘之師諸侯皆在江黃獨不與焉則安知其為謀伐楚乎曰兵有聚而為正亦有分而為奇諸侯之師同次于陘所謂聚而為正也江人黃人各守其地所謂分而為奇也次陘大衆厚集其陣聲罪致討以震中國之威江人黃人各守其境按兵不動以為八國之援此克敵制勝之謀也退于召陵而盟禮定循海以歸而濤塗執然後及江人黃人伐陳則知侵蔡次陘而二國不

會自為犄角之勢明矣此大會而未言者善是謀也
冬公子友如齊涖盟

謝湜曰齊將伐楚故季友適齊涖盟涖盟者我往受
盟于彼也來盟者彼來受盟于我也盟在彼而我往
臨之故書涖

楚人伐鄭

謝湜曰楚三年再伐鄭一侵鄭

春秋集義卷十八